

Zeitschrift: Schwyzerlüt : Zyttschrift für üsi schwyzerische Mundarte
Band: 25 (1963)
Heft: 3

Nachruf: Hans Schweingruber, Präsident der AKV, Bern : Sehr geehrti
Truurgmeind! Liebi Trurfamilie!

Autor: Schweingruber, Hans / Grunder, Karl

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 13.05.2025

ETH-Bibliothek Zürich, E-Periodica, <https://www.e-periodica.ch>

würdige, ohni chönne vollständig z' sy, abz'schliesse: I tue's aber mit nere Strophe vom Grabelied vo New-York, won er so grossi Freud dra gha het, wil die Värse em Dänke u Fühle vo däm treue Bärner u sänkrächte Schwyzer, vielmeh aber däm liebe Möntsche Karl Grunder entsproche hei un als Abschiedsgruess würdig schyne:

«Es tuet eim wohl, uf Schwyzerart
Bi Lieder z'sy u Gspässe,
U z'gseh, wi ds alte Vaterland
O andri nid vergässe.
Di neu Heimat hei mer gärn
U tüe se höch verehere —
Doch ds Härz muess üsem alte Bärn,
Em Schwyzerländli ghöre.

Hans Schweingruber
Präsident der AKV, Bern

Sehr geehrti Truurgmeind!
Liebi Trurfamilie!

Gestattet mir, als Präsident vo der Schwyzerische Gsellschaft volkstümlicher Autore, Komponischte u Verleger üsem hochverdiente, treue Ehremitglied Kari Grunder i paarne Worte z'gedänke!

Es si de nächschte Frytig, am 11. Jänner, drü Jahr, dass mer üse Ehrepräsident Osgi Schmalz z'Konufinge beärdiget hei. Die zwe brave, bodeständige Bärner, der Osgi u der Kari, hei im Jahr 1923 üsi Gsellschaft gründet.

Si hei gwüsst, dass im Schwyzerländli mängs Talänt im Verborgene blüeiht, sowohl Schriftsteller wie Komponischte, wo me zur Mitarbeit für d'Erhaltig

u Förderig vom ächte, heimatliche Jodel u Jodel-
lied sött yspanne.

Wil du Gsellschaft no d'Herusgab vo guete, neue
Wärk übernoh het, het Kari d's Amt vom literarische
Kommissionspräsident übernoh, wo jewile der Täxt
vo üs unterbreitete Lieder nach allne Gsichtspunkte
gründlich durchlüchtet het, damit vo üser Syte ja
nüt ungnüegends oder sogar unwürdigs a d'Oeffent-
lichkeit chöm.

Är sälber het vo Zyt zu Zyt verschiedene Kompo-
nischte prächtegi bärndütschi Gedicht zur Vertonig
glieferet. Unstärblich blybt das meisterhafte «Bär-
nerland, b'hüet Gott», komponiert vom Sängervater
J. R. Krenger.

Vo neuere Kari-Grunder-Gedicht chan-i nid anders,
weder hie vo zwöine je a Strophe z'läse, wo e so
rächt d's Gmüet, d'Seel vo ihrem Schöpfer drus
lüchtet:

Mys Heimatdorf

«Drum zieht's mi zrugg mys Läbelang,
wie wyt ig o möcht sy,
zrugg i mys liebe Heimatdorf,
vergässe chönnt is nie.
Du liebi, schöni Jugetzyt,
wie tönt so traut das Wort!
's git so viel schöns uf üser Wält,
's git nur eis Heimatort.»

Ds gfreute Jutze

«Z'ringsum alls im Zangge steit,
kei Friede isch z'erringe,
Treu und Glaube nümme treit,
im Gsang me si chönnt finge.

Drum äxtra muess hüt gjodlet wärde,
de gieng es gfreuter uf der Ärde.
We Treu u Glaube nümme treit,
im Gsang me si chönnt finge.»

Dass settegi Täxte zum Vertone hei müesse be-
geischtere, isch begryflech.

Liebe Fründ Kari! Die hütegi «schwyzerische Gsell-
schaft volkstümlicher Autoren, Komponische u Ver-
leger» danket Dir für alls, was Du für üs ta hesch
u was Du üs gschänkt hesch.

Gärn übernimeni o der Uftrag vom Bärnisch kanto-
nale Jodlerverband, sym verehrte Ehremitglied, dem
treue Jodler u Alphornbläserfründ, härzlechtscht
z'danke.

Kari Grunder het ja o yfrig mitgwirkt i der ämme-
talische Alphornkommission, wo sich zur Ufgab
gschtellt het, d's fascht vergässene Alphornblase im
Ämmetal neu z'erwecke.

Ufrichtige, grosse Dank chan i üsem unersetzliche,
liebe, treue Fründ au usspräche im Uftrag vo de
Ämmitaler Jodler Konufinge u G. Chörli, vom Jod-
lerklub «Berna», Bärn, vom Chörli «Daheim», wo
är überall isch Ehremitglied gsi, u vom chline, hei-
melige Zyschtig-Frundeskreis.

I ha pärsönlich no d's grosse Glück gha, die meis-
te vo syne sinnige Mundart-Liederspiele mit Chör u
Jodler ufz'führe u gseh gäng fräsch wieder der
Glanz i syne Auge, we-n-e Uffüehrig zu syr volle
Z'friedeheit glungen isch.

Liebe Kari! Us allne Dyne Wärk gspürt me tiefi
Heimatverbundeheit, Wahrhaftigkeit, Güeti u Wär-
mi, u das git e Gluet, wo nie erlöscht!

Drum wei mer nid chlage vor dym Sarg, nei, mir
wei em Herrgott danke, dass mer Di so lang hei
dörfe under üs ha.

Liebe Fründ u Dichter: Schlaf wohl!